

Semua jalan di Baling masih selamat dilalui

UM - 23/10/2006

BALING 22 Okt. - Semua jalan di daerah ini termasuk Lebu Raya Timur Barat masih selamat untuk dilalui walaupun berlaku hujan lebat sehingga mengakibatkan kawasan tertentu di daerah ini mengalami banjir.

Ketua Polis Baling, Pemangku Supritendan Mat Daud Mat Hasan berkata, setakat ini hanya beberapa kampung berhampiran sungai telah dinai-ki air sejak pukul 7 malam semalam.

"Kita sedang memantau perkembangan itu dari semasa ke semasa," katanya ketika dihubungi hari ini.

Katanya, walaupun penduduk yang mengalami banjir hanya berpindah ke rumah jiran dan saudara mereka tetapi polis telah mengambil langkah berjaga-jaga.

Bot penyelamat

"Kita telah membuat persiapan rapi termasuk menyediakan bot penyelamat bagi membantu operasi menyelamatkan jika diperlukan bagi membantu mangsa banjir," ujarnya.

Sejak petang semalam, laluan antara Pekan Tawar ke Kuala Ketil terjejas berikutan air melimpah di jalan raya di Kampung Binjul menyebabkan ada kenderaan ringan terkandas.

Polis juga meminta penduduk yang tinggal berdekatan sungai supaya berpindah sekiranya berlaku limpahan air sungai.

Sementara itu Mat Daud meminta pemandu yang menggunakan jalan raya terutama pada waktu hujan lebih berhati-hati berikutan jumlah kenderaan yang semakin bertambah pada musim perayaan ini.